

տարաւ օտար աշխարհներ եւ վարժեցրեց խաչագողութեան մէջ: Իսկ Կարօն, Ասլանը եւ Սագօն հետեւեցին որսորդի խորհրդին, թէւ, նոյնպէս օտար աշխարհներ գնացին, բայց իր նման չփչացան, այլ, կրթութիւն ստանալով, լաւ մարդիկ դարձան:

Չարմանալի՛ պատմութիւն էր այդ. դա թափառաշրջիկ, բախտախնդիր ժողովրդի տխուր պատմութիւնն էր, որի մէջ այդ ժողովրդի իւրաքանչիւր անհատը կարող էր գտնել իր մռայլ պատկերը...

– Ուրեմն դուք ձեր պատանեկութեան հասակից ծանօթ էք եղել Ասլանի ու նրա ընկերների հետ, – հարցրի ես, երբ նա վերջացրեց իր պատմութիւնը:

– Այո՛, իմ պատանեկութեան հասակից, – պատասխանեց նա: – Բայց, որպէս պատմեցի ձեզ, մենք անջատոտեցանք միմեանցից, մեր ճանապարհները բաժանուեցան, որսորդ Աօն առաջնորդեց նրանց դէպի լաւը, իսկ քաւոր Պետրոսը առաջնորդեց ինձ դէպի վատը: Երկար թափառումներից յետոյ դարձեալ մեր ճանապարհների ծայրերը միացան միմեանց եւ դարձեալ մենք ձեռք մեկնեցինք միմեանց...

– Բայց ինչպե՛ս եղաւ, որ դուք ուղղուեցաք եւ ետ դարձաք վատ ճանապարհից:

– Ես անցայ այն բոլոր մթին, ոլորմուր շաւիղները, որոնց մէջ պտտուում է խաչագողը. ես անցայ այն բոլոր շրջանները, որոնց մէջ լայնանում է, զարգանում է խաչագողի ընդունակութիւնը. յետոյ բռնուեցայ իմ յանցանքների մէջ եւ աքսորուեցայ: Այնտեղ, իմ հեռաւոր աքսորավայրում, ես ծանօթացայ մի լաւ մարդու հետ, որ նոյնպէս աքսորուած էր: Այդ մարդը իմ վրայ խիստ բարերար ազդեցութիւն ունեցաւ եւ ուղղեց ինձ:

– Ո՞վ էր այդ մարդը, ինչպե՛ս էր նրա անունը:

– Նա մի շատ խորհրդաւոր անձնաւորութիւն էր. ես մինչեւ այսօր էլ չգիտեմ նրա իսկական անունը. բայց բոլոր դատապարտեալները նրան կոչում էին «համր», որովհետեւ խիստ սակաւ էր խօսում:

Գիտե՞ք հիմա որտեղ է նա:

– Չգիտեմ...

Այժմ ես բոլորովին համոզուեցայ, որ խաչագողը, լաւ մարդկանց ազդեցութեան ներքոյ, լաւ հասարակութեան մէջ, կարող է կրթել եւ լաւ մարդ դառնալ: Բայց ես դեռ կասկած ունեի քաւոր Պետրոսի մասին, երբ հարցրի, Մուրադը պատասխանեց ինձ.